

O Concello de Verín organiza un obradoiro para aprender a facer o disfrace de cigarrón, ben sexa completo ou partes desta máscara. Os/as interesados/as poden inscribirse até o día 26 de novembro na Casa do Concello, na oficina de información (planta baixa).

As actividades formativas comezarán na primeira quincena de decembro, e na semana que remata co Domingo de Corredoiro exporanse na Casa do Escudo os disfraces que se confeccionaron. Para participar é imprescindible ter libres a tarde ou tardes nas que se desenvolvan as actividades. O martes día **30 de novembro**, ás **20.30 horas**, haberá unha **reunión na Casa da Cultura**

para presentar os formadores e ofrecer información complementaria a quen a precise.

O cigarrón é unha das mostras máis importantes de cultura material, no relativo á vestimenta das efemérides, tanto do patrimonio local como do de Galicia. Por este motivo desde o ano 1997, o Concello de Verín organiza anualmente este obradoiro. A finalidade é dobre: divulgar patróns para a confección dos diversos elementos que compoñen esa peculiar máscara, e ofrecerlle a posibilidade de facer os compoñentes deste complexo disfrace a calquera persoa sen coñecementos.

No Obradoiro do Cigarrón ensínaselles aos inscritos a facer os elementos artesanais da máscara, que son todos os do disfrace agás a camisa, as polainas, as medias, as faixas, o pano do lombo, os zapatos e os chocallos, que se poden adquirir de produción industrial. Tamén se informa aos participantes sobre o tipo de calzado que harmoniza co traxe, que tipo de chocallos e cantos se deben adquirir, ou como vestir o disfrace e utilizalo en público. Con isto preténdese que o cigarrón se manteña dentro duns canons de respecto polas formas clásicas da máscara, e que non se inclúan elementos aberrantes na confección e o uso. O prezo da inscrición para participar en todas as actividades é de 75 euros, mentres que para realizar só o traxe ou a careta é de 50 euros, como en anos anteriores.